

U' MUDERNISTA E A' VECCHIAREDDA

Na vecchiarredda cu' tant' outra genti
spittannu u' trammi a' la firmata,
visti passari na figghjiulazza vistuta
ma tantu malamenti cumminata
chi paria du' manicomiu nisciuta.

Dissi 'a vecchiarredda a buci forti :

“Vaddati comu è scunchjiuduta sta' ragazza,
parria a' riggina di' pizzara :
avi na cammisa tutta ripuzzata,
supra i labbra na' buccula 'nfilata
e i capiddi fatti alla spiritata”.

“No è na' ragazza”, rispusi pruntamenti
una chi si trovava 'nsemi a' genti,
“è nu ragazzu e si chiama Giggiu”.

-“Davveru mu dicitu ? veramenti ?”-

-“Ca certu, u pozzu diri picchi è me' figghjiu”.-

-“M’ata scusari, signura”-, dissi ‘a vecchiarreda,

-“no pinsava chi vui eruvu so’ matri”.-

-“Jò no sugnu so’ matri, ma so’ patri”-,

riplicavu dda pirsuna, risintita.

Dda povira mischinedda sbarruata

si fici a’ Cruci ca’ manu manca :

ddu omu era cusì malu cumminatu

chi paria di cannaluvvari vistutu.

Si misi ‘a diri ‘a vecchiarreda :

“Gèsu, Gèsu, a cchi puntu arrivammu !

Veramenti no c’è cchjiù munnu,

chista è l’epprica du’ prugressu,

‘a nostra terra addivintavu nu’ cessu !”.

“Siti vuij arritrata e no capiti nenti,

ora sì chi si vivi libiri e civilmenti,

no comu o’ vostru tempu scurantista”,

dissi dda speci d’omu mudernista.